

Te Heheuraa Api

E ITE I'A OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 4

-- EPERERA 1949 --

MAT. 36.

E PARAU NA TE PERESITENI

TE fatata mai nei te tau e tia'i ia tatou ia feruri i te mau ohipa ta tatou e rave no te tomoraa o to tatou Fare Pureraa apî, i Tahiti nei. E mea tia roa, i te mau Amaa atoa no te Ekalesia, ia faaineine i ta outou mau himene e i ta outou mau ohipa i mana'ohia e outou no te reira mahana.

E mea faahiahia mau te tahoêraa o FARANI, raua o RERANI, e te mau taeae no te mau Amaa atoa hoi, i te ohipa no te faatiaraa i to tatou Fare Pureraa apî e e mea tere roa ta ratou ohipa. I teie nei ua oti te paturaa no te taatoaraa o te Fare Pureraa e te haamatahia nei te tapoi i te reira fare. Ua oti te pae rahi o te mau ohipa i roto i te fare Orometua. Tirara te ohipa toe i reira, te peniraa i te fare e te faaneheneheraa i te mau piha.

Mai te au i ta outou i ite ra ua reva'tu o FARANI no te hoo haere i te mau taihaa no roto i te Fare Pureraa e te Fare Orometua atoa. Ia roaa mai te reira mau mea e ho'i faahou mai oia no te faaotiraa i ta'na ohipa. Na teie mau mea e faaite atu ia outou e, ua fatata te ohipa rahi i te oti i teie nei.

Te faataehia'tu nei teie nei parau no te faaara ia outou, ia faaineine i ta outou mau ravea no te tereraa mai i Tahiti no te oro'a tomoraa fare e no te Amuiraa rahi i te reira mau mahana. E mea tia atoa ia tatou ia haamana'o e, no tatou teie Fare Pureraa i Tahiti nei, no reira e mea tia roa, ia tatou atoa, ia tauturu i te mau ohipa atoa e ravehia i te tomoraa fare.

Ua hinaaro te tahi mau Amaa, no te Ekalesia, i te hoo i te hoê tao'a aroha no te fare pureraa e ua haamata ratou i te haaputu i ta ratou mau faufaa no te reira. Mai te mea te hinaaro nei te mau Amaa atoa, e tae noa'tu i te taata ta taitahi, i te na reira atoa e fariihia to ratou mau mana'o ma te oaoa rahi.

Ua riro to tatou Fare Pureraa apî ei hi'oraa maitai no tatou, e e riro atoa te reira ei aratai maitai, ia tatou atoa, i roto i te ohipa a te Atua. E mea tia roa, ia tatou atoa, ia haapao maitai ia faufaahia to te Atua here ia tatou na roto i To'na tautururaa ia tatou i te faatiaraa i te hoê fare nehenehe roa No'na ra.

Papaihia'tu e te Peresiteni Misioni
E. Bentley Mitchell Jr. (Mituela)

EDITORIAL

I TEIHEA I'OA TATOU E PIIHIA'I?

Ia Iesu i faatia'i i ta'na Ekalesia i rotopu i te atî Nephi, e a haapîi haere ai oia i reira, ua maiti Oia i te mau taata faa-tere na'na ra e ua haapîi hoi Oia ia ratou i ta ratou mau ohipa. E maoro rii a'era tupu atura te marôraa i rotopu i Ta'na mau pîpî no nia i te i'oa tia ia parauhia ta'na Ekalesia, e ua ui maira ratou i te Fatu; pahono atura te Faaora i te na ôraa'tu e: *E na hea ia te ekalesia na'u, ia ore ia parauhia i*

to'u i'oa? Ia parauhia hoi te Ekalesia i te i'oa o Mose, ua riro ei ekalesia na Mose; e ia parauhia ra i te i'oa no te taata, ua riro ia ei ekalesia no taua taata ra i reira; ia parauhia râ i to'u ra i'oa, e ia patu-mau-hia i nia i ta'u ra evanelia, e ekalesia na'u ia i reira. (III Nephi 27:8)

E piti mana'o faufaa rahi tei faaite-haapapu-hia mai i roto i taua parau poto ra. Te matamua ra, ia parauhia te Ekalesia a Iesu Mesia i to'na iho i'oa e tia'i, eiaha râ i te i'oa o te hoê pūpū, e a ore râ, i te i'oa o te taata nei. Eiaha roa te reira ia parauhia i te i'oa o te hoê peropheta rahi, mai ia Mose noa'tu, no te mea ia parauhia te Ekalesia i te i'oa o Mose, o te Ekalesia ia a Mose, e ia parauhia te reira Ekalesia i te i'oa o Paulo, Petero e o Ioane hoi, ua riro ia te reira ei ekalesia na Paulo, Petero e na Ioane. Eiaha atoa te Ekalesia mau ia parauhia i te i'oa o te hoê tufaa fenua, e a ore râ, no te hoê pūpū faatere no te reira fenua. Mai te mea e Ekalesia mau te reira na Iesu Mesia, ia parauhia te reira i te i'oa o Iesu Mesia e tia'i. E riro taua ture ra ei aveia i te mau taata atoa te imi nei i te parau mau. E mea papu roa te reira e aita e tia ia faahuru-ê i te reira ture.

E mea faufaa atoa te piti o te mana'o i faaitehia mai e te Faaora. A tai'o faahou tatou i Ta'na parau: Ia parauhia te reira i to'u nei i'oa, o ta'u ia Ekalesia i reira mai te mea ua patuhia te reira i nia i ta'u Evanelia. Ua faarahi faahou a-tura Oia i to'na mana'o i te na ô raa e: Eua patuhia te ekalesia ra i nia i ta'u evanelia, na te Metua e faaite mai i ta'na ihora ohipa i roto i te reira; aita râ te reira i patuhia i nia iho i ta'u evanelia, i patuhia râ i nia i te ohipa a te taata, e a ore râ, i nia i te ohipa a te diabololo, amene, e parau atu vau ia outou, e oaoaraa huru maoro to ratou i ta ratou mau ohipa, te fatata mai nei te hopea, ei reira ua tapuhia ratou, e hurihia'tura i roto i te auahi, e ore e tia ia ho'i ma. (III Nephi 28:10-11.)

E faatia paha te taata i te hoê haapaoraa na ratou iho, e e riro paha ratou i te parau i te reira i to te Faaora i'oa, e faahoho'a paha ratou i ta ratou haapaoraa mai te au i tei papahia i roto i te mau parau mo'a. Atira noa'tu i te reira, mai te mea ua patuhia râ i nia i te ohipa a te taata, e a ore râ, i nia i te ohipa a te diabololo, amene, e parau atu vau ia outou, e oaoaraa huru maoro to ratou i ta ratou mau ohipa, te fatata mai nei te hopea, ei reira e tapuhia ratou, e hurihia'tu i roto i te auahi, e ore e tia ia ho'i mai.

Aore e tia i te taata ia faatia i te hoê haapaoraa na'na iho mai te mana'oraa e, e mea mo'a te faatiaraa e te mana atoa hoi. E tia ia'na ia faatia i ta'na iho haapaoraa, mai te au i to'na iho hinaaro, ua riro ra te reira ei haapaoraa na'na iho, eiaha ra na te Atua.

E rave rahi te parau ta te Atua i parau mai, i tera tau e i tera mahana, no nia i te mau huru haapaoraa tei faatiahia e te taata, mai te mea ra e, e haapaoraa mo'a te reira. Te poto nei To'na faaoromai ia ratou, e hoho'a paieti to ratou e ua huna ratou i te mana no te reira.

Ia hinaaro mau te hoê taata i te parau mau e mea tia ia'na ia imi i te Ekalesia tei parauhia i te i'oa o Iesu Mesia. E i reira e papu atoa ia'na e ua faatia-mau-hia anei taua haapaoraa ra i nia i te *Evanelia*, e aita anei. E noaa taua haapapuraa râ na roto i te haapiiraa e te hi'opoaraa hoi i te mau parau tuatapaparaa, e te hoho'a faatereraa, e te mau parau haapiiraa atoa o taua haapaoraa ra, e ua au anei te reira i te mau irava mo'a? E ia oti taua mau mea ra i te haapaohia, teie te faito hopea ta te Fatu i horoa mai; a haapapu maitai e, te faaite mai nei anei te Metua i ta'na ohipa mo'a, e te maere hoi, i taua Ekalesia no te mea e ite outou ia ratou i te

mau mea ta ratou e faahotu mai.

Te faatia nei te Ekalesia a Iesu Mesia i te Feia Mo'a i te Mau Mahana Hopea Nei i taua mau ture ra. Te parauhia nei te reira i te i'oa o te Faaora, e ua faatiahia hoi te reira i nia i Ta'na Evanelia tei faatia-faahouhia-mai i teie mau mahana hopea nei, e te faaite-atoa-hia mai nei te ohipa mo'a o te Metua i roto i te reira.

TE MANA NO TE RA'I MAI.

E tuaatiraa teie.

Te Autahu'araa.

I te mau taime atoa ua hinaaro te Mana Hope i te parau mai i te taata tei parahi i nia i te fenua nei, e maiti Oia iho i to'na mau mono e e faatoro'a Oia ia ratou i to'na mana ia tia ia ratou ia rave i te ohipa na roto i to'na ra i'oa. Te mau parau e parauhia e ratou ra, i raro a'e i te ûrûraa o te Varua Maitai, e te mau ohipa ta ratou e faatere i raro a'e i Ta'na faatereraa, ua itehia ia e Ana, mai te mea ra na'na iho te reira i rave. Ia horoa Oia, ia ratou, te mana no te maiti faahou-raa i te vetahi atu â mau taata, e i te horoa'tu i te mau mana i mauhia e ratou ra, e faatia Oia i ta ratou maitiraa, e te mau ohipa atoa i ravehia na roto i te reira raveraa, ua mana roa ia. Ua parauhia te reira mana, no te ra'i mai, *te Autahu'araa* e ua horoahia te reira, e te Atua, mai te matamua mai â. Te vai ra te reira i te tau o te mau patereareha; ua ravehia te reira i roto i te tau tuuraa Evanelia no Mose, e te mau peropheta e ua faatia-atoa-hia te reira i roto i te Ekalesia Cherisetiano a te Fatu iho.

E piti tufaa e vai nei i roto i taua Antahu'araa ra: te Autahu'araa a Melehizedeka e te Autahu'araa a Aarona.

Te Autahu'araa a Melehizedeka.

Ua parauhia te Autahu'araa teitei, tei mau atoa te mana no te iti, i te *Autaha'araa a Melehizedeka*, no te mea te ora ra o Melehizedeka, te arii o Salema, i te tau no Aberahama, e ua farii te *Metua tane o te feia faaroo* i ta'na mau haamaitairaa, no ô mai ia'na ra no te mea te vai ra ia'na te hoê mana rahi mau. Ua faahitihia te reira parau i roto i te episetole i te atî Hebera, i te pene hitu. Ua rahi roa te mau marôraa tei tupu no nia i te tatararaa i te irava toru o taua pene ra tei na ô mai: Aore e metua tane, aore hoi e metua vahine, aore e ihotatau, aore e mahana matamua, aore hoi e hopea to to'na oraraa; i faarirohia râ oia mai te Tamaiti a te Atua ra, o te vai tahu'a maite mai â e a muri noa'tu. E mea tia ia imihia e, ua tano anei teie mau parau i nia i te Tahu'a, e a ore râ, i nia i te Autahu'araa? Aita roa te Autahu'araa a Melehizedeka i ta otiahia, mai tei na reirahia i nia i te Autahu'araa Levitiko i muri a'era, tei horoahia i te hoê noa iho utua-fare. E ere oia i te mea hee i roto i te fetii. E Autahu'araa mure ore oia, e tei rave ia'na ma te tia ra, e riro ia ratou ei mau arii e ei mau Tahu'a na te Atua e a muri noa'tu.

Te Autahu'araa a Aarona.

Ua ravehia te Autahu'araa a Aarona e ta'na mau tamarii na roto i te heeraa i nia i te matahiapo; no reira oia i topahia'i i to'na ra i'oa. Ta'na ra ohipa o te hâapaoraa ia i te mau ohipa haehaa e te mau ohipa no te pae tino. Aita te mau haamaitairaa teitei, e no te pae varua, e ô i roto i ta'na mau tufaa ohipa. Noa'tu râ i te reira, eita e tia i te taata ia rave noa i te reira tiaraa i nia iho ia ratou. No te rave i te reira Autahu'araa e mea tia ia maitihia ratou e te Atua, mai ia Aarona, mai te mea ra aita, eita ia e tia ia ratou ia faatere i te reira Autahu'araa. (Hebera 5:4) E mea na roto i te hoê heheuraa to te Atua faaiteraa ia Mose no te maitiraa ia Aarona e no te faatoroaraa ia'na.

Eita e tia i te Hoê Taata ia rave noa i te Autahu'araa.

Ma te heheuraa ore, no ô mai i te Atua, e ma te faatoroaraa ore ra, eita roa e tia i te hoê taata ia rave i te Autahu'araa a Melehizedeka. Aita roa o Iesu, no Nazareta, i rave noa i taua toro'a ra, noa'tu e e Tamaiti oia na te Atua. Na te Atua Metua i maiti Ia'na; *E Tahu'a oe e a muri noa'tu, ia au i te parau ia Melehizedeka.* E ua na ô mai o Paulo, *Oia atoa hoi te Mesia, e ere i te faatura ia'na iho oia i riro ai ei tahu'a rahi, na te Atua ra i faatura na tei parau mai ia'na e, O tau Tamaiti oe, i nauanei oe i fanauhia'i e au.* (Hebera 5:5)

Ua horoahia te Autahu'araa i te mau Aposetolo a te Mesia.

Ua hape roa te mau haapaoraa cherisetiano, no teie tau, i to ratou haapiiraa e, ua ore te Autahu'araa, i roto i to'na na tufaa e piti, i roto i te Mesia. E parau mau roa, ua mo'e te reira, no nia i te fenua, i na tau e rave rahi, e no reira aita'tura i tia i te taata ia rave i te mau ohipa tei faauehia, na roto i te i'oa o te Fatu. Area te mana tei mauhia e Iesu i roto i to'na tiaraa Tahu'a e a muri noa'tu, ia au i te parau ia Melehizedeka, ua horoa Oia i te reira i ta'na mau Aposetolo e te mau taviri atoa no te reira mana, *O ta outou e haamau i raro nei, e haamau-atoa-hia ia i te ao; e ta outou e tuu i raro nei, e tuu-atoa-hia ia i te ao.* (Mataio 18:18) Ua parau atu Oia ia ratou, *Mai ta to'u Metua i tonono mui ia'u, e tonono atoa'tu vau ia outou.*

Ua parau faahou atura Oia ia ratou, *E ere o outou tei hinaaro mai ia'u; o vau râ tei hinaaro atu ia outou, e ua haapao ia outou ia haere outou e ia hotu i te huero, ei huero vai-iho taiata.* (Ioane 15:16) Na roto i to ratou maitiraahia e to ratou aratai-raa-hia e te Varua Maitai ua noaa te mana i te mau Aposetolo ia maiti i te tahi atu â mau Tahu'a, mai ta Mose i rave no Aarona.

Aita te Autahu'araa iti i faaorehia.

Ua faaotihia te ture a Mose i roto i te Mesia, mai te au i to'na mana, no te pae tino, tei faaterehia e te Autahu'araa iti, e a ore râ, te Levitiko. Aita ra te Autahu'araa i faaorehia. Ua faa-rahi-hia râ, no te mea ua faaho'ihia mai te Autahu'araa a Melehizedeka, tei rahi. O te vahi te reira tei tauihia, mai te au i tei parauhia i roto i te episetole i te atî Hebera (7:12): *Ua faahuru-ê-hia te ohipa Tahu'a, e mea tia atoa ia faahuru-ê-hia te ture.* No reira ua papu roa e, aita roa te Autahu'araa i faaorehia, area râ, ua monohia te ture a Mose i te Evanelia a te Mesia, ua faatae-faahou-hia mai te Autahu'araa rahi no te mea e ture rahi a'e te Evanelia i te ture a Mose. Aita atura e faufaa faahou i te mau tusia animala tei rave-noa-hia e te Autahu'araa iti, i muri a'e i te tusia rahi a te Tamaiti a te Atua, e ua riro hoi ei mau taïpe ana'e no te reira hoho'a rahi. Area râ e mea tia roa ia ravehia te mau oro'a no te Evanelia e aita hoi e ravea no te raveraa i te reira maori râ ia ravehia e te mana no te ra'i mai. No reira riro atura te Autahu'araa, tei mauhia e Iesu, ta'na mau Aposetolo e te vetahi atu â mau taata tei maitihia e te Atua, na roto i ta'na mau tavini, ei tufaa rahi i roto i te tau tuuraa Evanelia cherisetiano.

Tei Maitihia e te Atua.

I te hi'oraa ra, e au e ua hape atoa te feruriraa no nia i te auraa o te parau *Maitihia e te Atua* mai te hape atoa no te Autahu'araa a te Atua. Oia mau, ia rave te vetahi mau taata i nia ia ratou iho i te rave i te ohipa, na roto i te i'oa o te Mesia, ua ite ratou, e a ore râ, ua mana'o ratou ua piihia ratou, e a ore râ, ua tae te titauraa ia ratou, na te tahi pûpû taata e na te tahi amuiraa taata, tei ere, mai ia ratou, i te mana e te mau heheuraa no ô mai i te Atua ra. A patoi ana'e tatou i to rato mau mana'o no nia i te huru no Saulo,

no Taresisa ra, tei parauhia i muri iho te aposetolo ra o Paulo. I roto i te parau i papaihia i roto i te Ohipa a te mau Aposetolo, i te pene 22, ua faaitehia e, ua fâ mai te Fatu ra o Iesu Mesia ia'na i nia i te purumu e tae atu ai i Damaseko. Tairihia ihora oia i te matapô. Na roto i te mana ua araara faahou to'na mata e ua parauhia ia'na e, *Ua haapaohia na oe e te Atua o to tatou hui tupuna ra ia ite oe i to'na hinaaro, e ia hi'o oe i taua Taata parau-tia ra, e ia faaroo hoi oe i te parau i to'na vaha. Ei faaite hoi oe na'na i te taata atoa i ta oe i hi'o na, e ta oe i faaroo na. E teie nei, eaha oe i hinaaro ai? a tia, ia baptizohia oe, e horoi ê atu i ta oe mau hara i te tauraa'tu i te i'oa o te Fatu.* I muri iho farii faahou atura o Paulo i te tahi faaiteraa e, e tonohia oia, e te Fatu, i te vahi o te mau Etene. (irava 12-21) Area râ aita oia i faatiahia ia rave i te ohipa no te poro-haere-raa i te Evanelia hou to'na faatoro'araa hia.

E mea nahea to te mau taata maitiraahia i te matamua?

Mai te au i te tai'oraa tau i roto i te Faufaa Apî, hoê ahuru matahiti i muri iho i to Paulo fariiraa i te Evanelia, oia hoi te mana ia rave na roto i te i'oa a te Fatu. Te faaite mai nei te parau mo'a e, a haaputuputu ai te tahi mau peropheta e te tahi mau orometua i roto i te Ekalesia i Anetiohia, *E te haamori râ ratou i te Fatu ma te haapaeraa maa, ua parau maira te Varua Maitai, A faataa mai ia Baranaba, raua o Paulo, no te ohipa i haapaohia e au na raua ra. Ua haapae ihora ratou i te maa e pure atura, ua tuu a'era i to ratou rima i nia iho ia raua, e oti a'era, tono atura ia raua.* (Ohipa 12: 2, 3; 9:15-18) Ua faaite noa Paulo, i roto i ta'na mau episetole e, e ere oia i te mea maitihia e te taata e ua haapii noa oia e, eita roa e tia i te hoê taata ia rave noa i nia iho ia'na te mana no te rave raa i te mau oro'a i faauehia mai, na roto i te i'oa o te Fatu. Ua papai oia i to Galatia e, *Paulo, e aposetolo, (e ere râ i ta te taata, e ere hoi i ta te taata haapao-*

raa, i ta te Mesia ra, e te Atua Metua, o tei faatia mai ia'na mai te pohe maira.) (Galatia 1:1) I to'na papairaa ia Tito ua na ô atu o Paulo: *Teie te mea i vaiiho ai au ia oe i Kereta ra, ia faanehenehe oe i tei toe ra, ia faatoro'a i te peresibutero i te mau oire atoa, mai ta'u i poroi ia oe ra.* (Tito 1:5) I to'na papairaa ia Timoteo ua na ô atu o Paulo: *Eiaha e vaiiho-noa-hia tei horoahia mai e te Varua i roto ia oe na; i horoahia mai ia oe ma te tohu ra, e te faauta-atoa-raa i te rima o te mau peresibutero i nia iho ia oe.* (I Timoteo 4:14) Mai te reira atoa te faatoro'araa o na Diakono e hitu mai tei faaitehia i roto i te Ohipa i te pene 6, e te irava 6.

Te mau Orometua no te Ekalesia a te Mesia.

Ia tai'o te hoê taata i te Faufaa Apî e papu ihoa ia'na e, te vai mau ra, i roto i te Ekalesia, te mau toro'a tei *Maitihia* no te ra'i mai e tei faaitehia e to tatou Fatu, e ia vai mau ihoa te reira mau toro'a i roto i te Ekalesia, mai te mea aita, eita e tia ia vai te hoê Ekalesia mau i nia i te fenua nei. I to'na parauraa no nia i taua vahi ra, oia hoi te mau toro'a mai te au i te faaueraa a te Mesia, ua na ô mai o Paulo: E ua haapao oia i te tahi pae ei aposetolo; e te tahi pae ei propheta; e te tahi pae ei haapii evanelia; e te tahi pae ei tia i e ei orometua. (Ephesia 4:11) Mai ta tatou e ite nei, ua maitimau-hia te reira mau taata, tei faaûrûhia, no te raveraa i te mau toro'a, na roto i te mana no te ra'i mai. Ua parauhia e, ua au noa te reira mau taata, *tei maitihia*, no te mau mahana matamua ana'e o te Ekalesia ra, ta tatou i tai'o a'enei, i te reira mana'o. Mai te au i te parau a Paulo, ua horoahia mai te reira mau feia i maitihia, Ei faaau i te feia mo'a i te ohipa ra e orometua, ia tupu i te maitai te faaroo hoê e te ite hoê i te Tamaiti a te Atua, ia taea te faito i te i o te Mesia i te rahi; ia ore tatou ia aueue noa i te mata'i ra, i tera parau, i tera parau, mai te tamarii ra, i te ravea a te taata nei, e te paari i te mau peu atoa o te haavare ra. (Ephesia 4:12-14)

Ia ore ana'e te reira mau taata tei faatoro'ahia e tei faaûrûhia, e tei mau i te Autahu'araa, eita roa te ohipa no te mau oro'a e oti i te ravea e tia'i i te Atua ia farii e ia haere te Ekalesia i te îraa.

Ia vai mau ihoa râ ratou e tia'i e tae noa'tu i te tau ua tae tatou i te tahoêraa i roto i te faaroo e te ite no te Tamaiti a te Atua. I to ratou ereraa i taua mana mo'a ra e i te horoaraa o te Varua Maitai, ua taa ê te mau Cherisetiano e te tama'i nei te mau cherisetiano ratou ia ratou iho; **E mea painu** noa ratou e ua pee noa ratou i te mau mata'i no te mau huru haapiiraa atoa, ua patu-noa-hia ratou i ô nei, e i ô nei, e te mau taata tei ore i faaûrûhia e te Atua, o tei paari i te faariroraa i te haavare ei mea nehenehe e tei ite i te aamu ia ratou na roto i te mau parau taparu.

E ere te Fare o te Atua i te Fare no te Anoi noa.

E mea faufaa ore, i mua i te aro o te Fatu, te mau toro'a, te mau oro'a baptizoraa, tamauraa, e te tahi atu â mau oro'a tei faatiahia e te taata e tei arataihia e te hoê mana no te taata nei, noa'tu ua ravehia te reira na roto i te aau tae e te paieti, e a ore râ, na roto i te hinaaro e haavare i te feia vare noa e te poiri, e eita atoa Oia e farii i te reira. Aita to ratou e mana e eita roa ratou e peehia i te hoê noa a'e tupuraa no te ora. **E ere te Fare o te Atua i te fare no te anoi noa**, e eita Oia e farii i te hoê mea, maori râ, tei faauehia e tei faataahia e Ana iho. Noa'tu i te maere o te reira, o te parau mau mure ore ia, tei tano maitai i te feruriraa e i te mau heheuraa atoa. Area ra e mea mana te parau mau e e upootia ihoa oia i te hopea.

Papaihia e: John A. Widtsoe.

PARAU FAAITE NA TE MAU UTUAFARE

UA parau mai te Peresideniraa Matamua, no te Ekalesia, i te matahiti 1915, i te matahiti 1936 e i teie nei atoa hoi, e mea tia roa ia faataahia te hoê pô i roto i te hebedoma, ei pô no te utuafare, ia tia i na metua ia haaputupu i ta raua mau tamarii i pihaiho ia raua mai te haapii atu ia ratou i te parau a te Fatu. Te tumu mau no te Pô UTUAFARE o te tahoêraa ia i te mau melo no te utuafare. Ia faaipoipo na taata e mea tia ia faatia raua i to raua Pô UTUAFARE. Tei na metua toopiti i te faataa i te mau mea e haapiihia e te mau ohipa e ravehia. Mai te mea te vai ra te tamarii e tia ia ratou ia tauturu i te faaneheneheraa i te tamaaraa e i te fare atoa hoi. E tia atoa ia ratou ia tauturu i te hime-ne, i te tai'oraa i te Evanelia e te faatiaraa i te mau aamu.

Tei te metua tane te faatereraa i taua pô ra. Tei ia'na te a'oraa i to'na utuafare. E mea maitai ia faaite oia, ia ratou, i te ohipa maitai ta ratou iho i rave, i te tahi taime e i te tahi taime. Ia faaroo te mau melo i te parau maitai te parauhia e te metua e tamata ratou i te faariro ia ratou ei mau tamarii maitai, mai ia'na te huru.

Ia haapao ihoa tatou i te PO UTUAFARE e tia'i.

E mea hinaarohia ia riro te mau Pô UTUAFARE ei mau pô oaoa e te anaanatae. E mea hinaarohia ia faatupuhia te here, te aroha, te haapao maitai e te nounou ore i roto i te aau o te mau melo no te utuafare.

Ua parau mai te peropheta ra o Iosepha F. SEMITA e: *Mai te mea e haapao te mau Feia Mo'a i taua po ra, e rave rahi te mau haamaitairaa te roaa ia ratou. E vai te aroha, e haapao maitai a'e te mau tamarii i te parau a na metua. E tupu te faaroo i roto i te aau o te mau feia api o Iseraela e e roaa ia ratou te re i nia i te mau faahemaraa ta ratou e fare-rei.*

Ia manuia tatou mai ta'na i parau, o ta'u'ia pure.

Papaihia e: Ruta Mitiela.

E Noaa Anei Te Hau Ia Tatou?

TE haruru noa nei te parau tama'i. E noa'tu i te reira te hinaaro noa nei te mau taata ia vai te hau. E tia anei i te hoê taata ia mana'o e, aita â i navai te hamaniraa toto, e ia haere noa te ohipa haamou a te tama'i? Te vai noa nei, i te mau vahi atoa, te peapea, te inoino e te nounou. Ua parare te mana'o ino i te mau vahi atoa. Ua rave rahi te taata tei mana'o ino i to ratou taata tupu. Ua vai noa te inoino i rotopu i te mau basileia; te mau hau tei aro a'enei i te aroraa hoê ra te tama'i nei ratou, ia ratou iho, i teie nei. Eaha, e vai anei te hau?

A tere noa'i tatou i roto i te mau matahiti e a haamata'i tatou i te tahi apî apî o te parau tuatapapa o te ao nei, te maere noa nei te aau o te taata nei i te mea e noaa ia'na i teie mau tau i mua nei. Eaha ra ta te reira e horoa mai?

E horoa mai te matahiti 1949, i to te ao nei, te mea ta ratou i hinaaro. Teie râ te ino, ua rave rahi te taata tei ino to ratou mau hinaaro, e ia huri te aau o te taata nei i nia i te ino e ohipa ino ihoa ta raton e rave, e na te reira mau ino e faatupu i te mauui, te oto e te pohe.

E ere i te mea tia ia mauui noa te taata e ia aro noa oia i roto i te tama'i. Ahiri te taata e hinaaro, e roaa ihoa i te ao nei te hau i teie nei, na roto i to ratou faarueraa i te nounou e ia farii ratou i te Metuaraa o te Atua e te Autaeaeraa o te taata nei. Ia hi'o noa'tu ra, no te faatupuraa i to tatou iho mau hinaaro ua riro tatou ei nunaa tei i te nounou, tei mana'o noa ia'na iho, e aita'tu ai.

No reira eiaha e maere i to te Fatu parauraa mai e, e tupu noa te tama'i i rotopu i te mau nunaa, e na roto i te reira, ma te o'e e te haamaniiraa toto e tupu te oto i rotopu i te mau taata o te ao nei, e no roto i te o'e, te ma'i, te aueueraa fenua,

te patiri o te ra'i e ite ai te taata o te ao nei i te riri, te inoino e te rima tairi o te Atua mana hope ra, e tae noa'tu te mouraa o te mau nunaa atoa mai te au i tei faaotihia ra. (Buka Fafau 87)

Na roto i to ratou ite i te mau parau mo'a ua ite te mau Feia Mo'a e, ia ore ana'e te taata ia tatarahapa e ia fariu atu i te Atua, e tupu noa te tama'i, te ma'i, te o'e, te aueue-raa fenua e te ati miti no te faainoraa i te taata nei. Ua rave-ê-hia'tu te hau no nia i te fenua nei e te mana nei o Sata-ne i nia i to'na basileia. E mea here a'e te taata i te poiri i te maramarama no te mea e ohipa ino ana'e ta ratou e rave nei.

Noa'tu i te reira mau tohuraa tei parau mai e, e vai noa te ino i nia i te fenua nei, te faaite atoa maira te tahi atu â mau tohuraa e, e haamaitai noahia te mau Feia Mo'a, Mai te mea e tia ratou i nia i te mau vahi mo'a, ma te aueue ore, e tae noa'tu i te taeraa mai o te mahana o te Fatu.

E mea rahi mau te ohipa e te hopea o teie nei Ekalesia. E mea rahi mau te ohipa te tia ia ravehia e te Feia Mo'a. Ia faaroo mai te mau nunaa e rave rahi ia tatou i te pororaa'tu i te Evanelia; e rave rahi te faaorahia; e faatupu-mau-hia te haaputuputuraa o te Feia Mo'a; e faaroo te mau mamoe i mo'e, no te utuafare o Iseraela, e tae noa'tu i te atī luda e te huaai o Lehi, ia tatou i te faaiteraa'tu ia ratou i te parau oaoa rahi, e e rave rahi to ratou te faaroo i ta tatou mau parau. E faataahia te mau feia ino i te feia parau-tia e e vai noa te mana o te Fatu i nia i to'na mau Feia Mo'a. Mai te mea e tamau maite ratou i te haapao i te mau haapiiraa a to ratou mau peropheta ra, te parau mai nei te Fatu e, ia tae i taua mau tau peapea ra, E haere noa te melahi no te pohe, mai ta'na i haere i nia i te mau tamarīi o Iseraela, ma te taparahi ore ia ratou, e e ore roa te mau taata iino, no te ao nei, e haere mai e tama'i ia ratou. (Buka Fafau 89: 45:70)

Ua rahi mau e ua nehenehe mau te mau parau i parauhia mai i te mau Feia Mo'a. A haere ai tatou na roto i teie matahiti apî 1949 a haere ana'e tatou ma te tiaturiraa papu, ma te faaroo e, mai te mea e tavini tatou i to tatou Fatu, te Atua, e tauturu mai Oia ia tatou no te faaotiraa i ta tatou ohipa, tei faataahia no to tatou nei nunaa e e paruru Oia e e haamanuia mai Oia i ta tatou mau tutavaraa, noa'tu i te huru o te mau mea atoa te tupu i nia i te ao paatoa nei.

Faaauhia e Marcel Bonnet

TE HAERE NEI TE EKALESIA I MUA

Te Revaraa.

I te mahana maha, te 3 no Mati i mairi a'enei, ua reva o Farani Fullmer i Marite, na nia i te avion o te Taiete Trapas. Ua tae atu oia i Suva e i Vaihi. Ua haere oia na nia i te tahi avion i Suva, no Niu Terani mai, no te haereraa'tu i te fenua Vaihi e i Marite atoa hoi. E toru mahana te maoro o to'na faaeearaa i Vaihi, hou a haere ai oia i te fenua roa.

O oia te taata faatere no te faatiaraa i to tatou Fare Pureraa apî. E ohipa rahi ta'na e rave i te fenua Marite, oia hoi, ua haere oia i reira no te hoo mai i te mau taihaa no te faaotiraa i taua na fare ra, mai te parahiraa, te mau paruru e te mau taihaa faaunauna no te mau piha o te Fare Orometua. Mai te mea e manuia maitai oia i te imi-haere-raa i te reira mau mea e ho'i mai oia, i Papeete nei, na nia i te pahi e tae mai i te ava'e Eperera, e a ore râ, i te ava'e Me. Te mau taihaa te roaa ia'na, i te reira tere to'na, e hurihia mai ia i nia i te reira pahi. Ia tae mai te reira mau taihaa, i ô nei, e tia ia ia tatou ia faaoti roa i to tatou Fare Pureraa apî.

To Tatou Aposetolo.

Ua haere faahou mai â o Mataio Cauri, Aposetolo, i roto i teie paeau o te te Moana Patifita nei. Tei Niu-Terani oia i teie nei e e tae faahou atu â oia i te mau Misioni o te Patifita nei, i teie tereraa to'na. Te opua nei oia i te haere, ei tere matamua, i te Misioni Tapone, e i muri a'era e tae atu oia i te tahi atu mau Misioni o teie paeau o te Moana Patifita. Te tiaturi nei tatou e, eita e maoro e tae faahou mai oia i rotopu ia tatou, i te Misioni Tahiti nei, no te farerei faahou ia tatou.

E Faaroo to te Ao atoa nei.

E ua parau maira Oia ia ratou, e haere outou e ati noa a'e te mau ferua atoa, e faaite haere i te Evanelia i te mau taata atoa.

I nia i te hoê motu rahi' tei fatata i te oire ra o San Francisco, ua faatiahia te hoê Fare Tapearaa rahi. Ua rave rahi roa te mau taata tei vai i roto i te reira fare no te mau ohipa iino ta ratou i rave. E tapeahia ratou i roto i te reira fare e tae noa'tu ua pau te taime tei faataahia no to ratou faaearaa i reira, no te mau hara i ravehia e ratou ra e te mau ture ta ratou i ofati ra.

Ia feruri tatou i te huru o te fare auri e tupu ihoa te hoho'a ri'ari'a i roto i to tatou mau mana'o, oia hoi, te hoê vahi tei ore roa i hinaarohia. Area, o ratou atoa i roto i te reira fare, e tamarii ana'e ratou na te Atua e te hinaaro nei Oia ia faaroo ratou i te mau parau faaora, oia hoi, te parau no Ta'na opuaraa no te tahuti ore e te ora mure ore no ta'na mau tamarii atoa.

I roto i na matahiti e vau i mairi a'enei ua haere noa te hoê Oromotua paari, no te Ekalesia, i roto i te reira fare auri, i te hoê noa iho taime, i te mau ava'e atoa, no te faatere i te hoê pureraa na te mau taata mau auri tei hinaaro i te haere i te reira pureraa. I roto i taua mau matahiti ra ua farrerei taua Orometua ra e vau hanere taata mau auri. Te vai nei te hoê Fare Pureraa iti, no ratou, e e 40 e tiahapa taata mau auri tei tia i roto i taua fare pureraa iti ra i taua Orometua i parauhia ra. I muri a'e i te mau pure-raa ua paraparau te Orometua i te tahi mau taata mau auri o tei hinaaro i te faaite atu ia'na i to ratou mau peapea e i te huru o to ratou mau aau.

Te ora nei ratou, i to ratou mau oraraa, i roto i te reira fare tapearaa, aita e tia ia ratou ia faarue i te reira vahi e tae noa'tu ua aufau ratou i ta ratou tarahu no te mau hape i ravehia e ratou ra. Area ra te imi noa hia nei te mau ravea no te tautururaa ia ratou, ia faarue ratou i te reira vahi, ia rave ratou i te maitai e ia haapae roa i te ino.

E piti uiraa maitai roa ta ratou i ui atu i taua Orometua ra. Teie ia te uiraa matamua: *Eaha te mana'o o te mau taata no rapae, no nia ia matou, ia faarue matou i teie nei vahi?* E teie hoi te piti o te uiraa: *Eaha te mau mea te tia ia matou ia rave, a faaea'i matou i ô nei, no te faaineineraa ia matou iho no te oraraa i rapae i teie nei vahi?*

Hoê â huru to tatou oraraa nei, i teie nei. E tia ia tatou paatoa ia ui ia tatou iho e, *Eaha ia te mana'o o te Fatu ia faarue au i teie nei vahi*, oia hoi, i te taime e tia'i au i mua Ia'na; e eaha te mau mea te tia ia'u ia rave no te faaineineraa ia'u iho no te reira farereiraa i mua i te aro o te Atua? E mea fifi roa a'e to ratou oraraa, i roto i te fare auri, i to te taata tiamâ e ora nei i rapae.